

تورک بوردی

اون بش کونده بر جیقار

تورکک فاندنه چالشیر

ایریم

کین

قارا قیش .. سسسز سسسز قوش باشی یاغان قار طاغی طاشی آزارتمش ،
باغلرده باغچه لرده کزوب قوشان چوجوقلری طاندر باشلرینه طویلالمش ایدی .
قارغالر یاراقلری دوکولش آفاج دالدرینه قوندجه قار بریکیتیلری یرلره
دوشویور ، صیرتنده اودون یوکلور برکویلو ایکی اوچ قاریش قار اوزرنده باتا
چیقاکیدیوردی . اورتالقی سیس بوس ایچنده کبی ایدی . بر آزدها بویله
سورهیدی عادتاً قار قوشاغه چیقاجق ایدی .

بوصیراده ایدی که کنج منلا یوله چیقمش قصبهیه کیدیوردی . پاراسی خرمن
وقتی ویرمک اوزره بر بارچا آریا بغدادی آلاجق ایدی . زیرا طول آناسیله
یتیم قارداشلری ده کندی باشه قالمش ، سفره سنده بش قاشیق دها آرتمش ایدی ؛
یورو یوردی . اوزاقدن آیرد ایدیله میه جک قدر صاریلوب صارمالانمش اولان
بریولجی یوقاریدن آشاغییه ، کندیسنه طوغرو یاقلاشمغه باشلا نیجه بردن بره
ایرکیلدی ؛ صوغوقدن قیزاروب موراران یوزی عادتاً اولو رنکی باغلادی ؛
او قارا کونی خاطر لادی : آلتی یرندن یارالاندقندن صوکره سوروکلنه سوروکلنه
تارلانک خندکنه آتیلان ، یوزی کوزی بلیرسز بر حالده جانسز یاتان باباجنی
کوزینک اوکنه کلدی . وایچندن دیدی که : « بن بوقانلی اوغلنی نه وقت
کوره جک اولسام یورکم حیزلی حیزلی چارپمغه باشلار ؛ دامارلرم کریلیر ؛ جکرلرم
کوکسمی قاپارتیر ؛ اونک اوزرینه آتیلیمق ، اونی دیشلرمله ، طیرناقلرمله
پارالامق ایستهرم .. آه اونک باباسی نیم بابامی اولدیردیکی کبی بن ده اولدورسهم ،
کبرتسهم ، یارالاسام ، قان ، قان ، قان ، قان ... »

— خایر دلی قانلی ، نه بر داملاقان ، نه بر داملا کوز یاشی سزک سینور
 بویارنده دشمن قورشونلریله یرلره سریلن شهیدلرکز ، غربت ایللرده کوزلری
 آجیق اولان یکتیلرکز آلور میورمی ؟ یوقسوللقلرک قارارتدینی اوجاقلرکز ،
 حق سزلقلرک ییقدینی اولرکز یتیم میورمی ؟ سن بیله شوکنج یاشکده کوی
 مصلا طاشی اوکنده کیم بیلیر قاج کنجک قانلی جنازه سنک نمازی قیلیمشکدر ؟
 کوی مزارلقنک تازه قبرلری اوزرنده کیم بیلیر قاج قادینک بوغوق هنجقرقلریله
 یتیمه مشسکدر ؟ سزک ساز شاعرلرکز اویانیق سسلره ، اوبوکوک بو یونلره
 سوبله دکلری تورکیلر بیله بر طاقم دردلیلرک آجیقلی حکایه لری دکلی در ؟ یونلر
 آز کلیورمش کبی سن ده یکی بر جنایتی ایشله یه جکسک ، باباکه هیچ بر فنانلی
 دو قونمایان بر معصوم وطنداشکک قاننه می کیرم جکسک ؟ خایر ، خایر ... سن
 تیجه ییللردن بری یورکلری یارالی ، کوزلری یاشلی اولان بوتون وطنداشلرکه
 مرحمتلی اول . اونلردن هیچ بریسنی اینجتمه ؛ هیچ بریسنی آغلانما . بو
 قارداشلرکک یارالرینی صارمغه ، کوز یاشلرینی سلیمکه چالیش .

کینکه کلنجه : مادام که کینجیسک ؛ دیمک که یک قوتلیسک . اویله ایسه
 سن بو کینکی کسکین بر قلیچ کبی صاقلا ؛ وبر قلیچی کیملر ایچون قوللاناجق
 ایسه ک بو کینکی ده اونلر ایچون قوللان . وطنک آیاقلری آلتیه قارا کلک اولوم
 اوجوروملری قازانلری بیل . ملتکک قوللرینه آغیر کولله نک زنجیرلری
 حاضر لایانلری اوکرن . دولتکک شانلی بایراقلرینی خان آلرله پارچالامق ایسته ینلری
 طانی . اجدادکک قانلی مزارلرینی کیرلی چیزمه لرله چیکنه ینلری بلله . و یونلری
 هیچ بر وقت عفو ایتمه ، یونلر ایچون کین بسله . سنک بو کینک اوحر آلنکک
 آلتنده هیچ بر زمان سونمه سین ؛ یدی قات یرک آلتنده کی آنشلر کبی هر وقت
 یانسین ! سنک بو کینک او آرکک یورککک ایچنده هیچ بر زمان صوصاسین ،
 کنیش چولک ایچنده کی آرسلانلر کبی هر وقت حایقیر سین ، بو کین سنک اک
 مبارک بر عشقک اولسون ! بو دشمنلرک کیملر اولدقلرینی اوکرمکمی
 ایسته یورسک ؟ ... بکا صورما ، تاریخی اوقو ، او سکا یونلری خبر ویر ...

محمد امین